

MOSCOVIA SIVE RVSSIA ALBA.

octuaginta millibus; magnum robur si disciplina & vigor cæterarum gentium Europæarum accederet. Peditum, qui *strelsey* dicuntur, continuo alit duodecim CIO, omnes sclopetarios, quorum V CIO circa civitatem Moscuam agunt, aut aliam urbem in qua versatur Princeps, atque II CIO in ipsa aula, qui *Stremaney strelsey* appellantur; reliqui in limitaneis oppidis in prædiis occupantur. His annuum stipendium datur VII rublæ, & secalis atque avenæ XII modii. De peregrinis militibus nihil dicere necesse est, quos non alit nisi quum necesse est, & semper quamplurimos alere potest, quum opibus abundet. appellant autem peregrinos & mercenarios milites *nimscoy*. Præfectorum sive ducum militarium ordo talis est; 1, Generalis Principis vicarius, quem *Voyavodey bulshaja*, id est, magnum Capitaneum dicunt; qui plerumque est unus è summa nobilitate, licet neq; prudentia, neq; bellicarum artium scientia emineat. 2, Ideoque illi adjungitur Legatus, nobilitate quidem inferior, sed belli usu præstantior. 3, Sub utroq; sunt quatuor veluti Marescalli, inter quos copiarum omnes dividuntur. Partes autem hæc quatuor distinctis nominibus exprimunt: Primam vocant *pravay polskoy*; id est, dexteram alam; secundam *levoy polskoy*, id est, sinistram alam; tertiam *rusnoy polskoy*, interruptam cohortem, quia ex illa speculatores emittuntur, & subsidia reliquis submittuntur; quartam *streshovoy polskoy*, id est, vigiliam cohortem. Singuli autem hi Marescalli duos habent legatos, qui bis singulis hebdomadis copias in armis exercent, & jus dicunt inter milites, puniuntque delicta; atque hi fere sumuntur ex illis CX de quibus ante dixi. Sub his porro complures sunt tribuni, quales sunt *gula-voy*, qui CIO, qui IO, & qui C militibus præ-

sunt: item *petyde setskoy*, qui I; & *decetskies*, qui X tantum præfunt. Sunt præterea in castris Vaivodæ duo magni nominis. quorum primus vocatur *Naradna vaivoda*, & præest tormentis omnibus bellicis, alter *Vaivoda gularoy*, quasi præfectum velutum dicas, qui speculatoribus CIO præest; & curam gerit lignei castelli, (quod *beza* aut *gulyaygorod* ipsis dicitur) quod semper cum castris circumfertur, in usum peditum, qui eo utrimque concluduntur; interdum ad aliquot milliaria in locum extenditur, ex asseribus ita compositum, ut nullo pene labore & conjungi & dissolvi possit; egregio munimento adversus Tartaros, qui arcu & sagittis solummodo armati facile ligneo hoc ut ita dicam vallo sustinentur. Russorum equitum arma fere sunt arcus & sagittæ, & gladius, paucis breves sunt hastæ aut spicula; omnia facta ad Turcarum modum: quibus ad Tartarorum modum uti edocti sunt. Peditum, sclopetum sive bombardam, securis & gladius. Commeatus nulla principum cura, unusquisque sibi ipsi prospicit; vili enim cibo contenti sunt Russi milites; neque fere quicquam usurpant præter panes siccatos, quos *suchary* vocant; & crudam farinam, quam temperatam & in massam rotundam coactam *tollockno* dicunt. Quod si Russi tantum robore & fortitudine animi, scientiaque militari valerent, quantum corporis viribus & laborum tolerantia, facile cæteros Europæos superarent: nunc ingenii tarditate, & serviendi consuetudine, nec magna appetunt, nec assequuntur. In oppidis quidem defendendis strenue adversus validas obsidentium vires laudem meruerunt; in acie adversus Polonos ac Suecos ut plurimum victi magnas sæpe clades acceperunt.

